

SYAIR BERENDOI

Lailahaillallah Muhammadur Rasulullah

1. Bismillah itu permulaan nama
Keadaan zatnya bersama-sama
Zahirkan sifat menyatakan Ismu
Kadim dan taat sedia lama.
2. Wahai segala anaknya Adam
Asalnya wahyu Nurul Khatam
Dipecahnya empat nasirnya Adam
Dipecahnya pula sekian alam
3. Benih bapamu turun kebumu
Empat puluh hari Nutfah namamu
Lapan puluh hari Alkah namamu
Seratus dua puluh hari Nudhfah namamu
4. Dikandungkan ibumu sembilan bulan
Lebih kurang tiada dapat ditentukan
Diperanakkan engkau beberapa kesakitan
Beberapa pantang minum dan makan.
5. **12 Rejab** di waktu pagi
Lahiriah **INAS SOFEA** cucunda puteri
Bersyukur kita kepada llaahi
Beriman serta bijak bistari
- 6 Kenangkan olehmu sekalian anak
Tatkala engkau lagi kanak-kanak
Engkau tidur mata ibumu pun jinak
Mencari makan manis dan lemak.
7. Wahai anakku jangan engkau bantah
Memeliharakan engkau sangatlah susah
Dialih ke kiri ke kanan pun basah
Supaya engkau tidur tidak gelisah
8. Setelah engkau sudahlah ada
Siang dan malam ibumu berjaga
Sedikit tak tidur barang seketika
Makan dan minum tiada selesa
9. Dipasang dian dengannya tanglung
Diangkat ditimbang lalu dibedung
Apabila jaga dipujuk didukung
Kasih dan sayang tiada terhitung
10. Tiada tentu siang dan malam
Tidur pun tidak dapat ditilam
Terkejut terjaga di tengah malam
Bangkit memangku di dalam kelam.
11. Kenangkan olehmu anak bangsawan
Barang katanya jangan engkau lawan
Ibu bapamu perhubungan tuhan
Baharu sempurna anak bangsawan.
12. Ibumu itu usaha bersungguh
Nyamuk pun tidak hampir ke tubuh
Tirai kelambu dibentang dilabuh
Dian dipasang hingga ke subuh.

13. Jika ibumu itu miskin berhutang
Kain sehelai sahaja dipinggang
Didodoi di buai anakku sayang
Didukung digalas tidak berenggang.
14. Jika ibumu itu orang yang kaya
Disuruh pelihara hamba dan sahaya
Serta dihimpun duit belanja
Itu pun dia kurang percaya.
15. Apabila engkau dapat membilang
Disuruh mengaji berulang-ulang
Ke rumah gurumu pagi dan petang
Setiap hari jangan engkau selang.
16. Apabila engkau dapat mengaji
Ibu bapamu sukalah hati
Mencarikan rial setiap hari
Hendak menyuruh engkau ke haji
17. Pergi ke haji tanah yang suci
Hendak membuang af'al yang keji
Sebabnya itu disuruh mengaji
Membaca al-Quran jangan engkau benci
18. Apabila mati anaknya Adam
Amalnya putus luar dan dalam
Tinggal perkara adalah dirakam
Sedekah amalan anak soleh yang faham.
19. Olehnya itu wahai anakku
Ibu bapamu taatlah selalu
Anak kunci syurga ada di situ
Quran dan hadis sudah mengaku.
20. Kerjakan olehmu amal sembahyang
Buatlah engkau hati yang lapang
Doakan ibu bapamu pagi dan petang
Dunia akhirat engkau ditatang.
21. Ya Allah Ya Rahman
Kita sekalian tetapkan iman
Sampai di sini madah dibacakan
Salah dan silap harap dimaafkan.